


LWITANYINO LOOBE



LWITANYINO LOOBE

Nankyebe kukita kini na muwa wande ?

Eyi dy'Efile-Mukulu adyamba'shi : « Kulupila mwi Ayikalayika n'eshimba dyobe dyoso, na twefikiinanga mu kyukilo kyobe ; muwukye mu mashinda oobe ooso, na'ye akabaata tushinda toobe ».

(Nkindji 3:5,6)

Dingy'efuku, Andele na ungi songwalume bapushishe Yoano mubatshishi akula pa bitale Yesu, « Talaayi mwana'a mukooko'Efile-Mukulu » (Yoano 1:36) babalondele Yesu. Babaadi abakyebe kuwuka ibungi pa Bimutale. « Na Yesu pabealulwile, na pabamwene bakwete kumulonda, bebayipwishe'shi : Anukimbi kini ? Na babamwalulwile'shi : Laabi (bu kwamba'shi : mulambukishi) wemushaleele kwikuni ? Bebalulwile'shi : Fikaayi na numone. Na babayiile naamu, na babamwene kubaadi mushaleele, na babashaleele mbwipi mwaye dyadya efuku.

(Yoano 1:38,39)

Yesu Enoobe kifulo (mukufule)

Pamwanda Yesu Enoobe kifulo, bafwile mwanda wa milwisho yoobe, ni nkifulo kya pa bupenka. Mutumiibwe Mpolo baadi na mpushisho ebula a kifulo kya Yesu. Bafundjile kukwa'ye Timote'shi : « Dino eyi ndyeyendo na ndilombene kutambudibwa'shi Kilisto Yesu bafikile pa senga pa mwanda wa kupaasha balwiishi, byandi'mi a kwibedi ».

(1 Timote 1:15)

Muloo wa kipandjilo

Dingy'efuku, « Na batwelele mu Yediko, na basambukile [Kibalo], Na talanga, muntu, ayitanyinibwa'shi Sakayo : Na baadi mukata a bawudishi ba bitadi, na baadi mpeta ; na bakimbanga bya kumona Yesu, byaadi ; na tabaadi byakwibikita, mwanda wa kibumbu, mwanda'shi baadi kishiisa kiipi. Na bayiile kumpala lubilo, bakamiine ku mutshi wa shikomole'shi amumone ; mwanda baadi na kya kukidila paapa. Na pabafikile pa yaya mbalo, Yesu bebosheshe meeso, bamumwene, na bamulungwile'shi : Sakayo, yika bukidi ; mwanda abintungu kushaala leelo mu shibo yobe. Na bayikile bukidi, na bamutambwile na muloo ».

(Luuka 19 :1-6)

Kibumbu takibaadi na muloo nya

Sakayo baadi muwudishi a bitadi bya bena Looma babaadi bamune Isalele ku aa mafuku. Kibumbu kibambile'shi : « Batwele kwa mukitshi a bubu mu kushaala ». Anka Yesu bambile'shi : « Mwana a muntu mufikye mu kukimba na kupaasha kyakya kibaadi kishimine ». (Luuka 19:7,10). Kibumbu ntakishingule'shi « Booso mbalwishe ». (Looma 3:23)

« Tubaadi booso atulubakana bu mikooko, muntu ooso balondanga dyaye'eshinda ». (Esaya 53:6)

Muntu ooso ena bwaye bushito kumpala kwa Mupangi eetu

Efile-Mukulu bambile'shi : « Talanga, Myuwa yooso ngyande'mi ; muwa wa mwana sunga wa she mwana, yooso ibidi ngyande ; kikudi akilwisha, nakyu akikafwa ». (Yesechiele 18:4). Anka beena kukumiina mbaaye pa mwanda wa nkuulo yabo. « Mwanda nubaadi bawudibwe ku muulo ukata. Byabya, tumbishaayi namu Efile-Mukulu mu mbidi yeenu na mu kikudi kyeenu, kikale ky'Efile-Mukulu ».

(1 Bena Kolente 6:20)

Efile-Mukulu bapangile byoso bwa mpango yaye

Efile-Mukulu ena lukalo lwa kupeta mwilo wadya kutambuka nawo na kwisamba nawo. Mwilo wa kufwisha muloo kwishimba dyaye bu byaadi Mupangi aabo. Bantu, bu Enoke na Nowa, babatambukile n'Efile-Mukulu. Abalahama baadi mwitanyinwe bu kuukw'Efile-Mukulu. (Kibangilo 5:24, 6:9 ; Shake 2:23). Fumu Yesu bayitanyine beeyi baaye'shi : « Ba kuuku bande » (Yoano 15:15). Mwabi kwi yawa ebyakwamba'shi : Yesu ni nkukwande !

Fikaayi nutome

Pabesambile Yesu na mukashi ku mpokolo a meema a ku Sishala, bamulungwile'shi : « Yawa oso akatomo aa meema akekala dingi na nyota ; Anka yawa akatomo meema ankamupa ; ami, takeekala na nyota nya ; anka ano ankamupa, akekala mwadi bu mpokolo a meema aalaala mu muwa wa yikalayika » (Yoano 4:13,14). Efile-Mukulu balungwile mutemuki Yelemya mu'Esambi dikulu pa mwanda wa mwilo wa Isalele'shi : « Mwilo wande ubakitshi mulwisho wi pabidi :

babampele, Ami sulo ya meema aatala, bwa kwibundwila meena a meema, meena a meema asasukye, ashi bya kulama meema ».

(Yelemiya 2:13)

Yesu bupenka bwaye ngi ebya kupudisha nkalo yi munda a ma shimba etu
« Fikaayi kwandji, anwe booso bakookye na basha mashito, na'mi, nankenupa kwikisha. Semunayi mushiyo wande, nuyiye kwandji ; mwanda wandji na kwiyisha na kupopeela kwishimba ; na'nwe anukapete kwikisha kwa bikudi byenu. Mwanda mushiyo wande ngupelepeele, na kiita kyande nkipelepeele ».

(Mateo 11:28-30)

Fikaayi, nudye.

Kunyima kwa lusangukilo lwa Fumu Yesu, bafumankeene na beeyi baye mu Ngadileya. Simeone Mpyele bebalungwile'shi : nende mu kuloba. Babamwalulwile'shi : atwe namu, atwende noobe. Babayiile na babakamiine mu bwato : na bufuku bushima tambakwate kintu. Na bufuku peepi na kutoka, Yesu bayimeene ku kyese ; Yesu namu bebambile'shi : bana, nwina kyakudya su ? Babamwalulwi'shi : nya. Pababafikile namu ku kyese, babamwene kaalo ka makala, na mishipa yibaadi itentekwe panundu na mukate. Yesu bebambile'shi : fikaayi, nudye. Na takubaadi mwiya suunga umune bamwipwishe'shi : A weni ? Mwanda babawukanga'shi Fumu. Yesu bafikile na baatshile mukate, na bebapeele wanka, anka byabya bimune bebapeele'ni mushipa. (Yoano 21:1-14). Pangi babaadi abatentekyesha mayi a Fumu Yesu : « Ami ne wini mukate wa muwa yawa afiki kwandji takeekala na sala ; na yawa akankumiina takeekala na nyota ».

(Yoano 6:35)

« Talanga, nemwimane pa kibelo na nakokola : su muntu apusha eyi dyande na ashitula kiibi, nakatwele mwaye na nakadi naye, naye akadi'nami ».

(Kileseso 3:20)

[Mbyalulwe mu Kisongye kwi bakwetu bano : Arthur NYINDU ASSANI, na Benjamin KAPEPULA NKONGOLO, mu Kabinda mu kipwa kya 2024, mweshi wa kabidi].

©C.E.R.S.-B.P.1673 Kananga

République Démocratique Du Congo

Email : 33eme.cers.lit@gmail.com

<http://www.33eme-cers.org/>